

灼

艾

集

灼父集卷之二

四明萬表選集

男達甫訂証
孫邦孚重梓

世說新語

華歆王朗俱乘船避難有一人欲依附歆輒難之朗曰幸尚寬何為不可後賊追至王欲捨所携人歆曰本所以疑正為此耳既已納其自託寧可以急相棄邪遂携極如初世以此定華王優劣

庾公亮乘馬有的盧

凶馬也
不利主

或語令賣去庾云賣之

必有買者即復害其主寧可不安已而移於它人哉

晉公孫叔敖殺兩頭蛇以為後人美談效之不亦達乎

司馬景王東征取上黨李喜以為從事中郎因問喜曰晉先公辟君不就今孤召君何以來喜對曰先公以禮見待故得以禮進退明公以灋見繩喜畏法而至耳

衛玠總角時問樂令夔樂云是想衛曰形神所不接而夢豈是想邪樂云因也未嘗夢乘車入鼠穴搏虀取鉄杵無想無因故也衛思因經目不得遂成病樂聞故命駕為剖析之衛即小差樂歎曰此兒胸中當

必無膏肓之疾

王丞相為揚州遣八部從事之職顧和時為下傳還同時俱見諸從事各奏二千石官長得失至和獨無言王問顧曰卿何所聞答曰明公作輔寧使網漏吞舟何緣採聽風聞以為察察之政丞相咨嗟稱佳諸從事自視缺然也

遠公在廬山中雖老講論不輟弟子中或有惰者遠公曰素榆之光理無遠照但願朝陽之暉與時並明耳執經登坐諷誦朗暢詞色甚苦高足之徒皆肅然增敬

魏武將見匈奴使自以形陋不足雄遠國使崔季瑋代帝自握刀立牀頭既畢令問諜問曰魏王何如匈奴使答曰魏王雅望非常然牀頭握刀人此廼英雄也

殷仲堪既為荊州值水儉食常五椀盤外無餘穀飯粒脫落盤席間輒拾以噉之雖欲率物亦緣其性真素每語子弟云勿以我受任方州云我豁平昔時意今吾處之不易貧者士之常焉得登枝而捐其本爾曹其存之

王恭從會稽還王大看之見其坐六尺簟因語恭卿

東來故應有此物可以一領及我恭無言去後即
舉所坐者送之既無餘席便坐薦上後大聞之甚驚
曰吾本謂卿多故求耳對曰丈人不悉恭恭作人無
長物

梁王趙王國之近屬賢重當時裴令公歲請二國租
錢數百萬以恤中表之貧者或譏之曰何以乞物布
惠裴曰損有餘補不足天之道也

霏雪錄

戴君伯康個儻士也有大志喜談兵言論風飛雪厲
聽者忘倦嘗云人生一飽之外皆為長物至正來居

姑蘇貧甚至於割薦而爨鬻糲而食參政董公搏霄
君故人也時持節調福州與道由姑蘇造君袖白金
一錠餉之君受而不辭遂得以給朝晡友人有所告急
者君持其半與之

樊公時中為浙江叅政觀潮嘗題詩樟亭云煙波閃
閃海門開平地潛生萬壑雷大信不虧天不老浙江
亭上看潮來公之志可見矣至正壬辰紅巾賊亂公
張弓抽矢馳射於其間賊應弦而斃者甚衆自亞至
申公矢盡竟死之

予喜五兵先生所述書室中修行灑甚有意味得之

不可不傳不得其人亦不必傳也因備錄於此云凡
心閑手懶則觀灋帖以其可逐字放置也手閑心懶
則治迂事以其可作止也心手俱閑則寫字作詩文
以其可兼濟也心手俱懶則坐卧以其不強役於神
也心不定宜看詩及禪短故事以其易於見意不滯
於文也心閑無事宜看長篇文字或經注或史傳或
古人文集此又甚於風雨之際及寒夜也又曰手冗
心閑則思心冗手閑則卧心手俱閑則著書作字心
手俱冗則思早畢其事以寧吾神

南郭子

陳有繼室林者性頗忌忽前室見夢曰春奴有娠必男若不舉將不利於四兒春奴蓋再室之媵而四兒則林所出也既而產果男林竟滄苑之未踰月四兒得左目奇疾目就腫腫下蔽其面即莊生所謂附贅懸疣也一日再室之兄過之林廼叩以疾狀且語之夢兄曰必兒為祟也試發視之瘞且五閱月肌色不壞瑩然如生特一礫掩其目遂去礫而改瘞之從浮屠灋以禳之厥後四兒竟亦以疾潰闕於中殤南郭子曰兒豈能為祟前室又豈能神於溟漠哉蓋聲和形和而氣和則天地之和廼至聲沴形沴而氣沴斯

天地之沴至矣天地之沴且至倭佛亦何所益蓋
人之忌者其聲形與氣將靡有不沴者矣天地之沴
杞應響答如此不亦甚可畏哉以一忌而殺二子又
焉保其他日之無他禍哉世之忌者矜此亦可以少
沮矣

有業棲樹以食者謂素可梨吾兒信之而以請予曰
妄哉失其序矣將惡乎可謂獨素無成固以請予曰
姑試之遂忻然將事既而不出吾所料憤其僨事也
詈之予廼進而慕之曰子過矣穹壤間理與氣焉耳
理者生物之始氣者生物之具也桃之與杏其理同

其氣不異類也續之則其實大以旨梅之與杏其理
同其氣少異亦類也續之則其實差小而柞枳之惡
橘柚之屬也可移以美推是以往凡可續者莫不以
其類類則理同而氣屬屬則生意流暢故殖不猶子
兄弟之子者乎若桑之與梨斯固非其類矣非其類
則氣不屬氣不屬則生意斬矣不猶子人之子者乎
且子人之子以類則非以氣則攜徒為瀆天之常紊
人之紀而已耳幾何而不為若教氏邪鄙人以其甥
管公子為後春秋以管人滅鄆書之其防微之意深
矣若以業樹者為尸子之食憤子之事而譽之世且

什百於子可勝言也哉

荆谿林下偶談

陳龍川省試試出過陳止齋舉第一場書義破止齋
笑云又休了舉第二場勉強行道大有功論破云天
下豈有道外之功哉止齋笑云出門便見哉然此一
句却有理又舉第三場策起云天下大勢之所趨天
地鬼神不能易而易之者人也止齋云此番得了既
而果中榜

蘇雲卿廣漢人身長七尺美艷髯寘言咲與張丞相
德遠為友靖康留擾避地豫章東湖之南包巾布褐

治圃種蔬耘耨有灋視他圃獨勝夜則織履履堅緻涉遠雖多不勞取之名曰蘇翁草鞋德遠入相貽書致厚幣蘇翁曰雲卿管樂流亞也聞今灌圃東湖斯人非可招為我詣其廬必致之帥漕更野服作遊客其圃翁方運鋤客揖與語良久延入坐土炕汲泉煮茗案無他物惟西漢史一冊客問翁鄉里曰廣漢客又問張德遠亦廣漢嘗識之否翁為言德遠家世歷歷客曰德遠之才可為宰相否翁掉頭不可客問何以翁曰惜其長於知君子短於識小人耳客徐拱立出書幣謂某等非遊客永乏帥漕

張丞相命屈先生共濟大業。翁色變喉間隱隱有聲，似怨張暴已踪跡。帥漕呼輿，隸約同載。翁謝以翌日當納謁。晨興候之戶閉，聞無人聲，挾而闖焉。則書幣不啟，翁已逝矣。人莫知所之。帥漕復命德遠拊几嘆曰：「求之不早，實懷竊位之羞。」作箴以識之。云：雲卿風節高，控傳霖。予期與之共濟，當今山潛水杳，邈不可尋。弗力弗早，予罪曷鍼。

自簪編

范文正公在杭州，子弟以公有退志，來間請治第場營園圃，以為佚老之地。公曰：「人苟有道義之樂，形骸

可外况居室哉吾今年踰六十生且無幾廼謀樹第
治圃顧何待而居乎吾之所患在位高而衆退不患
退而無居也且西都士大夫園林相望為主人者欲
吾常遊不得誰獨障吾遊者豈必有諸已而後為樂
邪俸賜之餘宜以賜宗族若曹遵吾言毋以為慮
韓魏公在相府時家有女樂二十餘輩及崔夫人亡
一日盡厚遣之同列多勸且留以為莫年歡公曰所
樂能幾何而常令人心勞孰若吾簡靜之樂也識者
以為過人遠矣

李文靖公沆所居陋巷廳事無重門其偏下已甚顏

垣壞甍不以屑慮堂并藥欄壞妻戒守舍者勿葺以
試沆沆朝夕見之經月終不言笑謂其弟維曰豈可
以此動吾一念哉家人每勸治第未嘗答維因語次
及之沆曰身食厚祿時有橫賜計囊裝亦可以治第
但念內典以此世界為缺陷安得圓滿如意自求稱
足今市新宅須一季繕完人生朝暮不可保又豈能
久居巢林一枝聊自足耳安事豐居哉

寇萊公初為樞密直學士賞賜金帛甚厚乳母泣曰
太夫人不幸時家貧求一縑作衾祔不可得豈知今
日賈富哉公聞之慟哭盡散金帛終身不蓄財產後

雖出入將相所得俸祿惟務施與公外奢內儉無聲色之娛寢處一青幃二十餘年時時有破壞益命補葺或以公孫弘事斬之笑荅曰彼詐我誠雖弊何憂且不忍處之久而以弊復棄也斬者愧之

季元衡儉說曰與其貪饕以招辱不若儉而守廉干請以犯義不若儉而全節侵奪以聚仇不若儉而養福放肆而遂欲不若儉而安性

韓魏公鎮相州因紀宣尼省宿有偷兒入室挺刃曰不能自活求濟於公公曰几上器具可直百千盡以與汝偷兒曰願得公首以獻西人公即引頸偷兒稽

頴曰以公德量過人故來相試凡上之物已荷公賜
顧無泄也公曰諾終不以告人其後為盜者以他事
坐罪當死於市中備言其事曰慮吾死後惜公之遺
德不傳也

傳獻簡公言李公沆秉鈞日有狂生叩馬獻書歷詆
其短李遜謝曰俟歸家當得詳覽狂生遂黷訕怒隨
公馬後肆言曰居大位不能康濟天下又不能引退
久妨賢路不寧愧於心乎公但於馬上蹴踏再三曰
屢求退以主上未賜允終無忤也

趙清獻公寬厚長者與物無忤家于三衢所居其隘

弟姪有欲悅公意者以厚直易鄰翁之居以廣公第
公聞不樂曰吾與此翁三世為鄰矣忍棄之乎命亟
還翁居而不追其直

楊珍尚書致仕歸長安舊居為鄰里侵占子弟欲詣
府訴其事以狀白珍珍批紙尾云四鄰侵我我從何
畢竟須思未有時試上含光殿基望秋風秋草正離
離子弟不敢復言

狄武襄公為范文正韓忠獻諸公所知後位樞密或
勸去鬢間字則曰青雖賈不敢忘本也每至韓公家
必拜于庭之下八拜夫人甚恭以即君之禮待其子

第其異於人如此或云狄青為樞密使為狄梁公之後持梁公畫像及告身十餘通詣青獻之以為青之遠祖青謝之曰一時遭際安敢自附梁公厚贈而遣之比之郭崇韜哭于儀之墓青所得多矣一日仁宗面諭使去其涅青指其面曰臣所以至此者以是耳願留以視軍中不敢奉詔

邵伯溫少時讀文中子至使諸葛武侯無死禮樂其有興乎因著論以謂武侯霸者之佐恐禮樂未能興也康節先生見之怒曰汝知武侯猶不可妄論况萬萬相遠以武侯之賢安知不能興禮樂也後生輒議

先賢亦不韙也伯溫自此於先達不敢妄論

橫渠先生言嘗欲為范文正公買綠野堂者公不肯曰在唐如晉公者是可尊也一旦取其物而有之如何得安寧使弊壞及他人有之已則不可取也

胡文恭公宿知湖州前守滕公大興學校費錢數萬未訖滕公罷去羣小斐然謗議以為滕公用錢有不明者自通判以下不肯書其簿公於墜折之曰君佐滕侯幾時矣假滕侯之謀有不臧與不早告陰拱以觀其去迺非之豈古人分謗之意一坐夫慚為公書筆談云狄青平嶺寇賊帥儂智高兵賊奔邕州其下

皆歛窮其窟穴青不從以請趨利乘勢入不測之城
非大將軍事智高因而獲免天下皆罪青不入邕州
脫智高於垂死然青之用兵主勝而已不求奇功故
未嘗大敗計功最多卒為名將譬如奕棋已勝敵可
止矣然猶攻擊不已往往大敗此青之所戒也臨利
而能戒廼青之過人處也

范公景仁既退居有園第在京師專以讀書賦詩自
娛客至無賚賤皆野服見之不復報謝故人或為具
召雖權貴不拒也不召則不往見之嘗乘籃輿歸蜀
與親舊樂飲賑施其貧者周覽江山窮極勝賞期年

然後返年益老而視聽聰明支體尤堅強嗚呼向使
景仁枉道希世以得富貴蒙屈辱任憂患豈有今日
樂邪景仁所得殊多矣元祐初肯以詔起公曰西伯
善養二老來歸漢室卑詞四臣入侍為我強起無或
憚動天下望公與溫公同升矣公辭曰六十三而求
去蓋以引年七十九而復來豈云中禮率趣 崔公
孺諫議大夫立之子韓魏公夫人之弟也性亮直善
面折人魏公執政用監司有非其人者公孺曰公居
陶鎔之地宜灑造化為心造化以蛇虎者害人之物
故置蛇於蟄澤置虎於山林今公廼置於道衢使為

民害可乎魏公甚嚴憚之

慶曆中議弛茶鹽之禁及減商稅范文正以為不可
茶鹽商稅之入但分減商賈之利耳行於商賈未甚
有害也今國用未減歲入不可闕既不取之於山澤
及商賈須取之於農與其害農孰若取之於商賈今
為計莫若省國用國用有餘當先寬賦後然後及商
賈弛禁非所當先也其議遂寢

趙槩與歐陽脩同在史館及同脩起居注槩性重厚
寡言脩意輕之時韓范在中書以槩為不文廼除天
章閣侍制會脩從子晟妻與人淫亂事覺語連及脩

大史集 卷三
脩時為龍圖閣直學士上怒獄急羣臣無敢言樂廼
上書言脩以文學為近臣不可以閨房曖昧之事轉
加汙蔑臣與脩踪跡素疎脩之待臣亦薄所惜者朝
廷大體耳

韓魏公言杜祁公公正而樂與人善既知其人無復
毫髮疑間始琦為樞密副使論難一二事祁公不樂
久而相信每事問曰諫議看來未諫議曾看便將來
押字琦益為之盡心不敢忽以此見祁公存心至公
不必以此於己為是賢於人遠矣

王質通判蘇州州守黃宗旦得盜銅鑄者百餘人以

託質質曰事蹟無跡何從得之宗旦曰吾以術除鉤
出之公愀然曰仁者可以術害人於死乎宗旦慙服
悉出其獄大稱公曰君子也

韓魏公勤吏職簿書文檄察檢研核莫不躬親左右
或曰公位重年耆必功名如此朝廷賜守鄉郡以養
安幸無親小事公曰已憚煩勞吏民當有受弊者且
俸祿日萬錢不事事吾何安哉杜正獻公衍嘗曰今
之在上者多摘瑣下位小節是誠不恕也衍知兗州
時州縣官有累重而素貧者以公組所得均給公租
不足即繼以公帑量其小大成使自足尚有復侵擾

者真貪吏也於義可責又曰折歷知州提轉安撫未嘗害一箇官員其間不職者即委以事使之不暇惜不謹者諭以禍福俾之自新從而遷善者甚衆不必繩以灋也

韓魏公辭位授陝西安撫使判永興軍時二府方奏事殿上議邊事未決曾公亮等奏曰韓琦朝辭在門外乞與同議上亟召之公既對即奏曰臣前日備員政府自當叅議今日藩臣也惟奉行朝廷命令耳決不敢預聞上觀公意確遂罷議
龐莊敏公自鄆徙并過京師謁上是時上新用文富

為相自以為得人謂公曰朕新用二相何如公曰二臣皆朝廷高選陛下拔而用之甚副天下之望上曰誠如卿言文彥博猶多私至於富弼萬口同詞皆云賢相也公曰文彥博臣頃與之同在中書詳知其所為實無所私但惡之者毀之耳况前日被謗而出今當愈畏慎矣富弼頃為樞密副使未執大政朝士大夫未有與之為怨者故交口譽之冀其進用而已有所利焉是後若富弼以陛下之爵祿樹私恩則非忠臣何足賢也若一以公議槩之則向之譽者將轉而為謗矣此陛下所宜深察也且陛下既知二臣之賢

而用之則當信之堅任之久然後可以責成功若以一人之言進之未幾又以一人之言疑之臣恐太平之功未易可致也上曰卿言是也

王文正公旦在中書有事關密院事礙詔格寇萊公持以聞上上以責旦旦拜謝引咎堂吏皆遭責罰不踰月密院有事送中書亦違詔堂吏得之欣然呈公公曰却還與密院寇公大慙翌日見公曰同年甚得許大度量公不答中書又偶倒用印萊公須勾吏人行遣他日密院亦倒用印中書吏人呈覆亦欲行遣文正問吏人汝等且道密院當初行遣倒用印者是

否曰不是文正曰既是不是不可學他不是更不問
真西山先生嘗過東山楊伯子見案上有近時人詩
文一篇西山一見擲之曰宗丞何用看此楊悚然問
故西山曰此人大非端士筆頭雖寫得數句詩所謂
本心不正脉理皆邪讀之將恐染神亂志非徒無益
楊佩服其言再三謝之

吳正肅公知蔡州蔡故多盜公按令為民立五保而
簡其灋民便安之盜賊為息京師有告妖賊聚確山
者上遣中輦人馳至蔡以名捕者十人使者欲得兵
自往取者公曰使者欲籍兵立威欲得妖人以還報

也。使者曰：欲得妖人爾。公曰：吾在此，雖不敏，然聚千人於境內，安得不知？使信有之，今以兵往，是趣其為亂也。此不過鄉人相聚為佛事，以利錢財爾。一弓一石之可致也。廼館使者，日與之飲酒，而密遣人召十人者皆至，送京師，告者果伏辜。

張忠定公有清鑒，善否臧人物。凡所薦辟，皆方廉恬退之士。嘗曰：彼奔競者，將自得之，何假吾舉？

劉忠肅公摯與同列，奏事因論人才。大槩公奏曰：人才難得。且嘗歷觀士大夫間，能否不一，性忠實而有才識上也。才雖不高，而忠實有守，次也。有才而難保。

可備以集事又其次也懷邪觀望隨勢改變此小人終不可用二聖諭曰此言極是卿等常能如此太皇官家何所憂也

趙清獻熙寧中以大賈政知越州兩浙旱蝗米價踊
貴饑死者十五六諸州皆榜衢路立賞格人增米價
公獨榜衢路令有米者任增價糴之於是諸州米商
輻湊詣越米價更賤民無饑死者公治民所至有聲
在成都越杭尤著

陳文惠公堯佐知壽州遭歲大飢公自出米為糜以
食餓者吏民以公故皆爭出米其活數萬人公曰吾

豈以是私惠耶。蓋以令率人不若身先而使其從之樂也。

張忠定公詠知杭州。是時歲飢。民冒禁販鹽。捕獲者數百人。公悉寬其罰。官屬執言不可。公曰。錢塘千萬家。餓殍如此。若鹽禁益嚴。則聚而為盜。患益甚矣。俟秋成。敢尔當痛以繩之。境內率以無擾。

歐陽文忠公嘗語人曰。治民如治病。彼富醫之至人家也。僕馬鮮明。進退有禮。為人診脉。按醫書述病證。口辯如傾聽之可愛。然病兒服藥云無効。則不如貧醫。貧醫無僕馬。舉止生疎。為人診脉。不能對病兒服

藥云疾已愈矣則便是良醫凡治人者不問吏材能否設施何如但民稱便即是良吏故公為數郡不見治迹不求聲譽以寬簡不擾為意故所至民便既去民思

曾文昭公肇知應天府宋當東南孔道宴勞無虛日公曰飾厨傳以邀往來之譽吾不為也

譚子

天下賢愚營營然若飛蛾之投夜燭蒼蠅之觸曉窗知往而不知返知進而不知退但知避害而就利不知聚利而就害夫賢於不賢於身何賢之謂也

博於物而不博於已何博之謂也是以大人利害俱
亡何往不滅

虎踞於林蛇遊於澤非鵠鳶

之讐鵠鳶
從而號之

以其蓄異心

之故也牛牧於田豕眠於圃非鳥鵲之馭鳥鵲從而

乘之以其無異心之故也是故麟有種角衆默不伏

鳳有利嘴衆鳥不賓君有奇智天下不臣善馳者終

於蹶善聞者終於敗有數財終有智則窮巧者為不

巧者所使詐者為不詐者所理

黃雀之為物也日遊於庭日親於人而常畏人而人

常撓之玄鳥之為物也時遊於戶時親於人而不畏

人而人不撓之彼行但促此行佯佯彼鳴啾啾此鳴
鏘鏘彼視矍矍此視汪汪彼心感感此心堂堂是故
疑人者為人所疑防人者為人所防君子之道仁與
義中與正爾何憂何害

救物而稱義者人不義之行惠而求報者人不報之
民之情也讓之則多爭之則少就之則去避之則來
與之則輕憎之則奪是故大義無狀大恩無象
為惡者畏人識必有識者為善者欲人知必有不知
者是故人不識者謂之大惡人不知者謂之至善好
行惠者恩不廣務奇特者功不大善博奕者智不遠

文綺麗者名不_レ久是以君子惟道是_レ賢惟德是_レ守所以能萬世不_レ朽

王取其絲吏取其綸王取其綸吏取其綽取之不_レ已至於欺罔欺罔不_レ已至於鞭撻鞭撻不_レ已至於盜賊盜賊不_レ已至於殺害殺害不_レ已至於刑戮刑戮不_レ已至於愛而哀歛者教之殺害非民願而鞭撻者訓之且夫火將逼而投於水知必不_レ免且賢其緩虎將噬而投於谷知必不可或覲其生以斯為_レ類悲哉觀食象者食牛不足觀戴冕者戴冠不足不足有所自庶有所始是知王好奢則臣不足臣好奢則士不

足士好奢則民不足民好奢則天下不足夫天下之物十之王好一民亦一王好五民亦五王好十民亦十以十論之則是十家為一家十國為一國十天下為一天下何不弊之有

奢者三歲之計一歲之用儉者一歲之計三歲之用至奢者猶不及至儉者尚有餘奢者富不足儉者貧有餘奢者心常貧儉者心常富奢者好親人所以多過儉者能遠人所以寡禍奢者事君必有所辱儉者事君必保其祿奢者多憂儉者多福能終其儉者可以為天下之牧

奢者好動儉者好靜奢者好難儉者好易奢者好繁
儉者好簡奢者好逸樂儉者好恬淡有保一器畢生
無璽者有挂一裘十年不弊者斯人也可以親百姓
可以司粟帛可以掌符璽可以即清靜之道

續觀感錄

后演芬事李懷光為假子懷光與朱泚連和為逆演
芬使客郤成義赴行在密言懷光有異志成義走告
懷光捕之罵曰爾為我子柰何欲破吾家今日負我
宜即死對曰天子以公為股肱公以我為心腹今公
乃負天子我何得不負公耶我胡人無異志惟知事

一人耳。苑固吾分。復何說哉。

劉留臺自少極貧。專事趨謁。鄉人厭之。一日往泉州。謁親表徐司戶。至則徐已別調。復徒步歸。至漳州。入浴堂中。拾金一袋。浴畢。託疾卧堂中。終夕不去。翌早。有一人號哭而至。自言為商於外。八年不歸。只聚得金八十五片。以一袋盛之。昨晚醉中。與同伴携而至。此浴罷。乘月行三十里。始覺其金不見。劉遂舉以還之。彼以數片遺劉。不受。及還。鄉人愈薄之。曰。拾金不能營生。而復來相干。邪。公曰。平生賦分止合如此。若掩他人物。以為己有。必有禍灾。且彼辛勤所積。一旦

失。去。或。不。得。還。鄉。或。死。非。其。命。其。害。有。不。可。勝。言。者。
吾。是。以。還。惟。安。分。以。畢。餘。生。耳。未。幾。父。子。同。膺。鄉。薦。
一。舉。得。第。至。官。西。京。留。臺。後。五。十。年。間。子。姓。登。仕。途。
者。二。十。有。三。人。曾。孫。侍。郎。嘗。錄。其。事。鐫。之。以。戒。子。孫。
曰。當。以。高。祖。之。心。為。心。居。家。者。慈。儉。以。安。分。居。官。者。
勤。以。守。節。凡。物。非。己。者。不。得。妄。有。觀。覩。云。

溫人趙彥霄兄弟二人。父母亡後。同爨二十年。事兄
彥雲。惟謹。彥雲耽嗜聲色。博奕無所不至。生業日壞。
彥霄諫之。兄怒。遂求柝籍。不過五年。而兄之資產蕩
然矣。公私逋負。尚三千餘緡。彥霄因除夕置酒。邀兄。

嫂而告之曰向者初無分爨意以兄用度不節恐皆
蕩盡俱有飢寒之憂故勉從耳今幸我一半尚留不
廢亦足以給伏臘兄自今復歸中堂以主家務即取
分書授之如管鑰之屬悉以付焉因言兄所負錢已
措備償之矣兄初有慚色不從見彥霄意甚勤懇遂
受之次年彥霄與長子俱膺鄉薦一舉登第鄉人歌
服

王達者屯田郎中李曇僕夫也事曇久曇親信之既
而去曇應募為兵十年矣會曇以子孝學妖術事貶
曇夫婦械繫御史臺獄上怒甚獄急曇平生親友無

一人敢餉問者達獨旦知守臺門不離給服飲食者
幾兩月曇貶恩州別駕諸子皆流嶺南仍使人監防
出國門達追泣而隨之防者過之達曰此我主人也
豈不得相隨乎曇河朔人不習嶺南水土其家人皆
辭去曰我不能從君之虎鄉也達獨在左右不忍去
數日曇自縊處旁無家人達使母守曇尸出為之治
喪事朝夕哭如親父子見者皆為流涕殯曇於城南
佛舍然後歸嗚呼達賤隸也非知有古忠臣烈士之
行又非矯迹求令名以取祿仕者獨能發於天性不
顧罪累以救其故主之急始終無倦如此豈不賢哉

彼得於曇者不過一衣一食而已今世之士夫困人
之力或致位卿相已而故人臨不測之患屏手側豎
戾目窺之猶患其禍之延及已也若畏猛火去而避
之又或從而擠之以自脫敢望其優恤極救也耶
東坡記齊人劉庭式未第時議娶其鄉人之女既約
而未納幣庭式及第其女已病兩目皆盲女家貧甚
不敢言欲勸納其勿女庭式笑曰吾已許之矣雖盲
豈負吾初心哉率娶盲女與之諧老陳無已談叢云
華陰呂君舉進士聘里中女行既中第婦家言曰吾
女故無疾旣聘而後盲敢辭呂君曰旣聘而後盲君

不為欺又何辭遂取之生五男皆中進士第其一人丞相汲公是也

唐琦開封人紹興衛士也高宗南渡虜帥海金琶八追至紹興太守李鄴以城降琦資性忠勇誓與虜偕死以報國一日鄴方與琶八並馬而行琦持二大斃登小閣上祝曰願天相我一擊殺此兩賊不幸斃中馬琦被執琶八曰大金兵數百萬汝殺我一人何益琦曰欲碎爾腦以愧降虜者耳因罵鄴曰我月請官一石米且不肯負國汝受國厚恩乃甘心降虜尚得為人邪琶八怒曰汝欲何以死琦曰我願以布裹尸

灌油焚三日。琶八如其言焚之。琦恐琶八迫及高宗。故以焚尸緩其程耳。會稽帥傅崧鄉請為立廟祭之。其文曰：虜內侵六年，士大夫畏避，至不敢稱虜為賊。其能為宋伏節死難者，乃一衛士狙擊虜酋嫚罵降帥，至死猶不絕口，嗚呼偉哉！

楊誠齋夫人羅氏年七十餘，每寒月黎明即起詣厨，躬作粥一釜，遍享奴婢，然後使之服役。其子東山先生啟曰：天寒何自苦如此？夫人曰：奴婢亦人子也。清晨寒冷，須使其腹中畧有火氣，迺堪服役耳。東山曰：夫人且勞賤事，何倒行而逆施乎？夫人怒曰：我自樂。

此不知寒也汝為此言必不能如吾矣東山守吳夫
人嘗於郡圃種苧躬紡緝以為衣時年蓋八十餘矣
東山月俸分以奉母夫人忽小疾既愈出所積券白
以長物也自吾積此故意不樂果疾作今宜悉以謝
醫則吾無事矣平居首飾止於銀衣止於紬絹生四
子三女悉自乳曰飢人之子以哺吾子是誠何心哉
誠齋父子視金玉如糞土誠齋將漕江東有俸給僅
萬緡留庫中棄之而歸東山帥五年以俸錢七千緡
代下戶輸租其家竹椽土階如田舍翁三世無增飾
史良叔守廬陵官滿來訪入其門外其堂目之所見

無非可敬可仰可師可灑者所得多矣因命畫二圖
之而去

玄敬詩話

張士誠據吳中東南名士多往依之不可致者惟楊
庶夫一人士誠無以為計一日聞其來吳使人要於
路庶夫不得已乃一至賓賢館中時元主方以龍衣
御酒賜士誠士誠聞廉夫至甚說即命飲以御酒酒
未半廉夫作詩云江南歲歲烽煙起海上年年御酒
來如此烽煙如此酒老夫懷抱幾時開士誠得詩知
庶夫不可屈不強留也

宋王烈婦清風嶺事昭灼在人耳目士大夫過而題詩者甚衆楊庶夫詩云界馬馱馱百里程清烽後夜血書成祇應劉阮桃花水不似巴陵漢水清後庶夫夢悔之乃更作詩有寧從湘瑟聲中死不向胡笳拍裏生之句則與前詩迥不相侔矣又苒昔有人作詩以非烈婦者詩云嚙指題詩似可哀斑斑剝剝上青苔當時若有詩中意肯逐將軍馬上來語意與庶夫初見正同後其人竟以無嗣子謂詩賢忠厚王婦之事烈烈如此可謂難矣而二詩皆有貶辭所謂於無過中求有過豈忠厚之道哉

東坡嘗拈出淵明談理之詩有三一日採菊東籬下
悠然見南山二曰嘯傲東軒下聊復得此生三曰客
養千金軀臨化消其寶皆以為知道之言予謂淵明
不止於知道而其妙語亦不止是如云縱浪大化中
不喜亦不懼應盡便須盡無復獨多慮如云望雲慚
高鳥臨水愧遊魚真想初在襟誰謂形迹拘如云朝
與仁義生夕死復何求如云及時當勉勵歲月不待
人如云前途當幾許未知止泊處古人惜分陰念此
使人悲觀是數詩則淵明蓋真有得於道者非常人
能蹈其軌轍也

道家言人身中有三尸又謂之三彭每庚申日乘人之睡以其過惡陳之上帝故學道者遇是夕輒不睡許郢州詩云夜寒初共守庚申是也柳子厚集有爲尸蟲文元吳涇穎有三彭傳則儒者亦以爲有是物矣嘗記避暑錄話載道士程紫霄詩云不守庚申亦不疑此心嘗與道相係玉皇已自知行止任爾三彭說是非此言近道蓋得孔子丘之禱久矣之意也朱陳村在徐州豐縣東南一百里深山巾民俗淳質一村惟朱陳二姓世爲婚姻白樂天有朱陳村詩三十四韻其畧云縣遠官事少土深民俗淳有財不行

商有丁不入軍家家守村業頭白不出門生為陳村
人死為陳村塵田中老與幼相見何欣欣一村惟兩
姓世世為婚姻親屬居有族少長遊有羣黃鷄與白
酒歡會不隔旬生者不遠別嫁娶先近鄰死者不遠
墓墳墓多統村既安生與死不苦形與神所以多壽
考往往見玄孫子每誦之則塵襟為之一灑恨不生
長其地後讀坡翁朱陳村嫁娶圖詩云我是朱陳舊
使君勸農曾入杏花村而今風雨那堪畫縣吏催錢
夜打門則宋之朱陳已非唐時之舊若以今觀之又
不知其何如也

韻語陽秋

王稚川調官京師母老留鼎州久不歸侍嘗聞賢人
歌舞有詩云畫堂玉珮縈雲響不及桃源款乃歌山
谷和韻諷之云慈母每占烏鵲喜家人應賦虞夏歌
可謂盡朋友責善之義山谷至孝奉母安康殆至為
親滌廁淪浣中裙未嘗頃刻不供子職洎貶黔南不
能與親俱則贈玉郎詩云留我左右手奉承白髮親
至賴上食蓮有感則曰蓮實大如指分甘念母慈亦
可見其孝誠矣予聞無瑕者可以攷人則其告稚川
之語未為過也老杜送李舟詩非不歸重而其中亦

不能無譏焉所謂舟也衣綵衣告我欲遠適倚門因
有望歛衽就行役南登吟白華已見楚山碧何時太
夫人堂上會親戚豈非譏其無方之遊邪孔子云父
母在不遠遊遊必有方則山谷少陵之詩皆有孔子
之意也

孟郊落第詩曰棄置復棄置情如刀刃傷再下第詩
曰一夕九起嗟夢短不到家下第東南行曰江鯉伴
我泣海月投人驚愁有餘矣下第留別長安知己云
豈知鵝鳴瑤草不待春失意投劉侍御云離婁豈
不明子野豈不聰至寶非眼別至音非耳通歎命云

題詩怨還怨問易蒙復蒙本望文字達今因文字窮
怨有餘矣至登科後詩則云昔日慳懃不足誇今朝
放蕩思無涯春風得意馬蹄疾一日看盡長安花議
者以此詩驗郊非遠器余謂郊偶不遂志至於屢泣
非能委順者年五十始得一第而放蕩無涯哦詩誇
咏非能自持者其不遠大宜哉

陶淵明乞食詩云飢來驅我去不知竟何之而繼之
以感子漂母惠愧我非韓才則求而有獲者也杜子
美上水遣懷云驅馳四邊內童稚日糊口而繼之以
但遇新少年少逢舊知友則求而無所得者也山谷

貧樂齋詩云飢來或乞食有道無不可過青草湖云
我雖貧至骨猶勝杜陵老憶簪上岳陽一飯從人討
由是論之則杜之貧勝於陶而山谷之貧尚優於杜
乃知貧者固士之常也

聽雨紀談

孟宗為鹽魚司馬罷職還道作兩絕鮓以奉母母曰
吾老為母嘗言惟飲彼水何吾言之不從也陶侃作
魚吏以蚶鮓餉母母反書責侃曰汝為吏以物見餉
非惟不能益吾反以增吾憂二母事絕類予惟世之
為吏者往往累於父母妻子所謂父母但知喜悅竟

不問物從何來若二母者可以為濫也

曹操好方外之士所招致者甘陵甘始廬江左慈陽
城郝儉悲善辟穀號數百歲曹植作論辨之以操為
匠夫所罔納虛誕之詞信眩惑之說是矣其曰玄黃
所以娛目鏗鏘所以聳耳娛妃所以紹先窈窕所以
悅口何以甘無味之味聽無聲之樂觀無采之色也
以予觀之植雖辨道未為知道也夫無味之味天下
之至味也無聲之樂天下之至樂也無采之色天下
之至色也

草木子

色聲臭味天之所生也耳目鼻口人之所具也目知
色耳知聲鼻知臭口知味此四者天人之相交也使
無耳目則聲色又烏用生之哉則造化或幾乎熄矣
此天地之所以善藏其用也至於心則又所以具此
理而應此事者也宰制四者於中而各聽命焉此其
所以官天地役萬物者也故並於兩間而為三
智襄子為美室士出曰高山峻原不生草木松柏之
下其土不肥今土木勝臣懼其不安人也室成三年
而智氏亡

近時有以張巡傳糊窗者有一士人見之而題四句

於其右云坐守睢陽當豹關江淮賴此得全安至今
青史雖零落猶障窗風一面寒

謬云南人不夢駝北人不夢象缺於所不見也蓋寤
則神舍於目寐則神棲於心蓋目之所見則為心之
所想所以形於夢也

夢之大端二想也因也想以目見因以類感舉世皆
夢也夢夢也不夢亦夢也夢乎夢不夢乎不夢是故
得失蕉鹿也物我蝴蝶也榮枯黃梁也

父子

父子出游見一嫗白髮而衣袞麗之服哭甚哀父子

謂曰姬何哭而若此之哀也姬曰哭吾夫也父子曰
姬自高年而始哭夫不識夫誰也曰彭祖也父子曰
彭祖壽八百而死固不為短可以無恨姬曰吾夫壽
八百誠無恨然又有壽九百而不死者豈不恨邪

養生類纂

云笈七籤曰譙國華陀善養性弟子廣陵吾晉彭城
樊阿授術於陀陀嘗語晉曰人體欲得勞動但不當
極耳人身常搖動則穀氣消血脉流通病不生譬猶
戶樞不朽是也

耄智餘書云遣其情如刀之伐樹非一斧可倒求真

理如食之充腸非一口可飽修道積功大率如斯
本草衍義總叙曰夫未聞道者放逸其心過於生樂
以精神徇智巧以憂畏徇得失以勞苦徇禮節以身
世徇財利四徇不置心為之病矣極力勞形譟暴氣
逆當風縱酒食嗜辛鹹肝為之病矣飲食生冷溫涼
失度久坐久卧大飽大飢脾為之病矣呼呌過常辯
爭僂脊冒犯寒暄恣食鹹苦肺為之病矣久坐濕地
強力入水縱欲勞形三田漏溢腎為之病矣五病既
作故未老而羸未羸而病病至則重重則必斃嗚呼
是皆弗思而自取之也

褚氏遺書曰養耳力者常飽養目力者常瞑養臂指者常屈信養股趾者常步履

養生要訣曰一人之身一國之象胞臆之設猶宮室也支體之位猶郊境也骨節之分猶百川也腠理之間猶四衢也神猶君也血猶臣也氣猶民也故至人能理其身亦猶明君能治其國夫愛其民所以安其國愛其氣所以全其身民弊即國亡氣衰即身謝又曰能攝生者當先除六害然後可以延駐何名六害一曰薄功二曰禁聲色三曰廉貨財四曰損滋味五曰屏虛妄六曰除疾妬六者若存則養生之道徒

設耳蓋未見其有益也

又曰多思則神散多念則心勞多奕則臟腑上亂多
言則氣海虛脫多喜則膀胱納客風多怒則膝理奔
浮血多樂則心神邪蕩多愁則頭面焦枯多好則智
氣滯溢多惡則精爽奔騰多事則筋脉乾急多機則
智慮沉迷茲刀伐人之生甚於斤斧蝕人之性猛於
豺狼

又曰心內澄則真人守其位氣內定則邪物去其身
行欺詐則神悲行爭競則神沮輕侮於人當減算殺
害於物必傷年行一善則魂神歡行一惡則魄神喜

堯神欲人生 鬼神欲人死 常欲寬泰自居恬淡自守
則神形安靜 疾病不生 夫抱朴子曰 凡夫之徒 不知
益之為益 廼又不知損之為損也 夫損易知而速焉
益難知而遲焉 尚不悟其易 亦安能識其難哉 夫損
之旨如燈火之消脂 莫之見也 而忽盡矣 益之者如
禾苗之播殖 莫之覺也 而忽茂矣 故治身養性 務謹
其細 不可以小益為不足 而不修 不可以小損為無
傷 而不防 凡聚小所以就大損 一所以至億也 若能
愛之於微 成之於著 者則知道矣

養生以不傷為本 此要有也 且才所不逮 而因思之

傷也力所不勝而強舉之傷也悲哀憔悴傷也喜樂過差傷也汲汲所欲傷也戚戚所患傷也久談言笑傷也寢息失時傷也挽弓引弩傷也沉醉嘔吐傷也飽食即卧傷也跳走喘急傷也歡呼哭泣傷也積傷至盡則早亡早亡非道也是以養性之方噍不及速行不疾步耳不極聽目不極視坐不至久卧不及疲先寒而衣先熱而解不欲極飢而食食而不可過飽不欲極渴而飲飲不可過多凡食多則結積聚飲多則成痰癖也不欲甚勞甚逸不欲起晚不欲汗流不欲多睡不欲奔車走馬不欲極目遠望不欲多啖生

冷不欲飲酒當風不欲數數沐浴不欲遠願廣志不
欲規造異巧冬不欲極溫夏不欲窮涼露卧星下不
欲眼中見扇大寒大熱大風大露皆不欲冒之五味
入口不欲偏多故酸多傷脾苦多傷肺辛多傷肝鹹
多傷心甘多傷腎此五行自然之理也凡言傷者亦
不便覺也謂久則損壽耳

著生論曰身有四氣人多不明四氣之中各主生死
一曰乾元之氣化為精精反為氣精者連於神精益
則神明精固則神暢神暢則生健若精散則神疲精
竭則神去神去則死二曰坤元之氣化為血血復為

氣氣血者通於內血壯則體豐血固則顏盛顏盛則生合者血衰則髮變血敗則腦空腦空則死三曰庶氣庶氣者一元交氣氣為津津復為氣氣運生生託於氣陰陽動息滋潤形骸氣通則生氣乏則死四曰衆氣衆氣者穀氣也穀濟於生終誤於命食穀氣雖生蘊穀氣還死精能附血氣能附生當使循環則身永固乾元之陽陽居陰位臍下氣海是也坤元之陰陰居陽位腦中血海是也生者屬陽陽貫五臟喘息之氣是也死者屬陰陰納五味穢惡之氣是也氣海之氣以壯精神以填骨髓血海之氣以補肌膚以流

血脉喘息之氣以通六腑以扶四肢穢惡之氣以亂身紳以腐五臟

三餘贅筆

記禮者云猩猩能言不離禽獸淮南子云猩猩知往而不知來西國胡人取其血染毳蜀色鮮不黧或曰若刺其血問之爾與我幾許猩猩曰二升果足其數若加之鞭撻而問之則隨所加而得焉阮汧云魯使封谿見邑人說猩猩在山谷數百為羣里人設酒路側又織草為屨更相連結人伏伺其旁猩猩見酒及屨則知為餌已又知設者祖先姓字遂斥罵其人且

相戒曰毋墮奴輩計中舍爾而去復相謂曰試共嘗之既而染指知味則冥然忘夙戒相與沾濡不覺逮醉因取屨看之顛連頓仆乃為人所擒予謂猩猩獸也曾何足道人為萬物之靈廼有黷貨好色貪爵戀祿迷而不知止者不亦猩猩之類也乎

九沙山人萬表曰是集者山人灼艾時所集也山人廢書久矣乃以灼艾休暇日涉諸說九有會於心者輒手錄之不覺成帙遂名之灼艾集云